

La dure prese di posizion di **Paolo Fontanelli** cuintri la escluson des iniziativis pe valorizazion des lenghis minoritariis dai bants regionâi pe culture.

» DI **CHRISTIAN ROMANINI**



Paolo Fontanelli

# At cussient di discriminazion

O sin in plene setemane de Culture, realizade de Societât. L'assessor regionâl ae Culture **Gianni Torrenti**, in ocasion de presentazion a Udin, nol à mancjàt di meti i pontins sui (siei) "i" ricuardant che "no vin di dismenteâsi di Triest"...

E cemût si fasial a dismenteâsi di Triest, massime te culture, viodût il grant mâl di panze jevât in dut il Friûl propit des ultimis decisions cjapadis di chest assessor?

No dome pai passe 400 mil euros dâts ae cooperative che

e gjestis il teatri Bonaventura dulà che al è stât lui stes president e che i à finanziade la campagne eletoral, ma ancje pai ultims bants regionâi pe culture che a metin tant che element di escluson "la valorizazion des lenghis minoritariis".

## VISION INADEGUATE

"Forsit no sin devant dome di une sorte di discriminazion, ma alc di piês" al denuncie **Paolo Fontanelli**, president dal Comitât pe autonomie e il rilanz

dal Friûl: "La discriminazion e sarès un at cussient, fat cun cognizion di cause: chi o sin di front a une vision des politichis culturâls e linguistichis dal dut inadeguate e superficiali!"

La posizion di Fontanelli e je clare: "La vision e lis azions a pro de culture a son dal dut diferentis tra Friûl e Triest e di chest si varès di tignî cont: fâ culture in Friûl al vûl dî lavorâ a plen suntun teritori grant, dispès poiansi su tant volontariât ancje se no mancjin struturis organizadis e professionistichis, che però a son une vore di mancual rispjet al ambient triestin".

Duncje doi monts, dôs manieris di viodi la cuistion che, daûr dal resonament di Fontanelli, "a varessin di jessi tratâts in maniere diferente. Invezit no si ten in considerazion il contest plurilinguistic dal Friûl che al è ae fonde ne nestre specialitât. Il dirit ae autonomie al passe par chi, dal dirit di un popul a fevelâ la sô lenghe mari. Friûl, tiere cun 600 mil furlanofons, passe 50 mil slovenofons e cualchi miâr di gjermanofons: minorancis linguistichis ricognossudis e tuteladis daûr dai articui 2, 3 e 6 de Costituzione taliane e des normis europeanis" ma escludûts dai criteris di assegnazion dai bants pe culture regionâi".

## SPECIALITÂT IN PERICUL

La conclusion di Fontanelli e je clare: "Cui che al propon altris motivazions (geografichis o logjistichis) pe autonomie cussî debilis e inconsistentis al rint indifindibile la nestre specialitât che o riscjin di pierdi par ignorance, provincialisim e siovinisim".



ilfriuli@ilfriuli.it

## ■ FRAE DE VIERTE

### Apontament a Buri cu la Filologjiche

Il tradizional apontament de fin Primevere organizât de Filologjiche Furlane, la Fraie de Vierte, chest an al è inserît inte prime edizion de Setemane de culture furlane e si tignarà a Buri che, cu la sô grande ricjece paisagjistiche, culturâl e gastronomiche e la sô Fiere regionâl dai vins, e devente sede ideâl par chesteste fieste, organizade in colaborazion cul Comun di Buri, la Pro Loco Buri e il Comitât regionâl de Union nazional Pro Loco.

Il program al previôt la messe aes 9; i lavôrs a tacaran aes 10.30 inte sale des cunvignis di Vile di Toppo Florio. A laran daûr il gustâ sociâl, aes 13 (prenotazions al 0432-501598 o scrivint une mail a [info@filologicafriulana.it](mailto:info@filologicafriulana.it)). Des 15 lis visitis vuidadis al Museu de Civiltât dal Vin, al Lapidarium e al parc archoe-botanic de Vile di Toppo Florio.

Par informazions e par cognossi il program complet: sit [www.filologicafriulana.it](http://www.filologicafriulana.it), pagine Facebook de Filologjiche, e-mail [info@filologicafriulana.it](mailto:info@filologicafriulana.it).

## SCOLTADIS DI DRIUS

### Puaris rosis

Le femine, partide pes feris, mi à ordenât di bagnâ ogni di les sôs rosis. Mi son muartis parfin chês di plastiche.



Euronews informa

## La Provincie e à regalât il libri "Storie dal Friûl" di Pio Paschini aes cuintis dai istitûts Paschini, Solari e Linussio

"Tornait a scuvierzi e no stait a dismenteâ la nestre storie, o vês di jessi braurôs di partignî a cheste grande tiere: la Cjargne e je la scune de nestre identitât". Chest l'invit che il president de Provincie di Udin, Pietro Fontanini, al à indreçât ai students des classis cuintis dai istitûts Paschini, Solari e Linussio vie pe cerimonie che si è tignude inte sale conseâr dal Comun di Tumeç ae conclusion di un proget didatic sul teme de figure di Pio Paschini. Iniziative promovude doi agns fa de amministrazion (volude dal assessor ae culture de Zonte precedente, Aurelia Bubisutti) par vie dai cincuant agns de muart dal ilustri concitadin e sostignude de Provincie di Udin che, ae conclusion dal studi, e à volût dâ in omaç ai students une des oparis plui prestigjosis dal Paschini, la "Storie dal Friûl". L'incontri, presiedût dal gnûf sindic Francesco



Brollo, al à viodût i intervents de dirigente scolastiche Lucia Chiavegato, dal professor Cesare Scalon dal Istitût "Pio Paschini pe storie de glesie in Friûl" e dal conseîr provinciâl delegât ae montagne Luigi Gonano. E je stade

une ocasion par ricuardâ il contribût impuartant di cognossince su la storie dal Friûl dal Paschini, su lis incarghis prestigjosis otignudis a nivel ecclesiastic, ma ancje un moment par meti in lûs la metodologie scientifiche rigorose

aplicade ai siei studis e la sô passion pe ricercje de veretât. Metodi che i à puartât ancje cualchi displasê ma che no lu à fat smeti. Fontanini in particolâr si è fermât sui contignûts dal libri donât ai students. "Une opare voluminose che e tache cu la descrizion des originis de nestre storie e si ferme su la ete dal aur, il Patriarcjât. Un periodi di fuarce, di unitât che al à puartât al disvilup de Cjargne fintremai al mâr, cun Aquilee tant che centri di riferiment ancje pe difusion dal cristianisim". "Chesta storie e pues jessi lete in paralel cun chês francese, inglese, todesce - al à zontât Fontanini - Impuartant, soreudut in cheste societât simpri plui globalizade, al è cognossile, difindile par trasmetile a chei altris in maniere vierte e savint confrontâsi. Cognossi la storie nus permet ancje di difindi la nestre lenghe, il furlan, espression di un passât gloriôs di prudelâ". Sul finî, ancje i students a àn puartât un contribût originâl ae figure di Paschini proponint la leture di cualchi letare ae famee e ai amis alternade al ricuart biografic dai moments plui significatîs, ma ancje plui difici, de sô vite.